

Straßburg, 25. Mai 1569

An Theodor Zwinger

UB Basel, Fr. Gr. I 11, fol. 321r.

S. Naiades Badenses, Clariss[ime] vir, D[omine] et amice colende, etsi omni erga me functae sunt officio, non tamen ita me exhilararunt vt tuae humanissimae literae. A Polycarlo Gemusaeo accepi nouem terniones Isocraticos et eleganter et satis emendatè excusos. Editionem, illius indicio et voluntati committo. Ego non is sum, qui vrgere quenquam importunè velim. Accepto hoc iam praeclaro specimine, aequiore animo et viuam (si Deo Opt[imo] Max[imo] visum fuerit) et moriar. Episcopius si meum Demosthenem acceperit: ipse, vti spero quamuis difficila tempora sint, fatebitur, me nihil iniqui postulasse. Verum si mihi remittere voluerit correctionem Graeci et Vlpiani, contentus ero singulis florinis in singulos terniones et 12 exemplis. Qua de re me primo quoque tempore fieri certiorem velim. Corrigere graecum Demosthenem, est Augiae stabulum repurgare: in quo vix vlla pagina est, in qua non 30 aut 20 turpissimae depravationes occurrant: quos ego σὺν Θεῷ propulsau in meo codice: verum ita varijs emblematis interpolato, vt nemini possit, nisi mihi, vsui esse. Annotaui quidem illa ferè omnia, et in meos commentariolos retuli: neque curo (quod ad me quidem attinet) magnopere Graeca. quae tamen edi quam emendatiss[ime] è re Episcopij etiam est futurum: qui habiturus est opus quod aetatem feret, eiusque officinam si non ornabit, certè non deformabit. Accedet gnomologia graecolatin<a> Aschininis, Demosthenis, Vlpiani, quae seorsim m<inore> forma excusa certatim à studiosis adolescentibus emetur. Sed haec hactenus. Vnum addo, vt Demosthenicum specimen prima quaque occasione, vbi absolutum fuerit, ad me mittatur: ἵνα μὴ δις τὴν κράμβην. De legato Cariniano rem omnem tuae commendo fidei. Sunt apud vos Augustani patricij: qui si pecunia eguerint, parentes eorum domi mihi satisfacent: quod quidem quò maturius factum fuerit, eò gratius est futurum.¹ Haec lauatio ad 60 f. mihi constitit et precia rerum omnium Augustae crescunt: vt profectò satagam rerum mearum, cum etiam soror et nonulli pauperes cognati mihi sint de tenui reditu meo sustentandi. Plura non scribo, nisi quicquid in hoc testamentario et typographicò negocio, sine tuo incommodo praestiteris, id mihi futurum esse gratis[imum] αὐτῷ τῷ μέτρῳ, καὶ λώιον, εἴ κε δυναίμην. Ramo, Polycarlo, Episcopio et si qui alij Wolfij meminerunt, omnia feliciss[ima] precor. Vale, et me, vt facis, beare perge. Argentinae. 25. Maij 1569.

Hiero[nymus] Wolfius
Tuus.

¹Am Rand ergänzt: Daud Wolckenstain <...> eorum praeceptor, pro vetere noticia libenter mihi gratificabitur, cui multam salutem opto, vnà cum suis.